

Predigt Fasnachtsgottesdienst



Predigt Fasnachtsgottesdienst

Gescheiterte Gemeindefusion

(Im Wechsel)

Ramona:	NEI
Renato:	NEI
Ramona:	NEI
Renato:	3
Ramona:	MAL
Renato:	NEI
Ramona:	I will nöd
Renato:	I cha nöd
Ramona:	I wott nöd

Einleitung - Renato

Bis zur Französische Revolution hät Räbschte zum Hof Marpe ghört, das hät i üsem Dorf dozmol so

mänge gstört.

Oft händ Marper und Räbschter gstritte,

ob s do gnueg hälli Köpf git, händ's z Marpe bestritte.

„Die z Räbschte schaffid's nie e eiges Dorf z regiere, die sind doch zu dumm zum sälber politisiere.“

Alles hät me unternoh um Räbschte z bhalte, und die Dörfer uf kein Fall z spalte.

Meh als zweihundert Johr spöter wieder s glichi, damol goht's au nöd um armi oder richi.

Die einte wänd die beide Gmainde wieder vereinige, doch si gönd wiit usenand die verschiedene Meinige. Übers Abstimmigsresultat wird bi de einte glached,

„Isch mer doch glich was die beide mached.“ Anderi redet mit Gwüsse kai Wort meh, sie händ für d Fusion kai Zuekunft gseh.

Mer wänd jetzt do nöd politisiere, nöd die einte oder andere kritisiere.

Aber mer wänd eu verzelle was mer händ beobachtet, und im stille Kämmerli für üs drüber glached.

Vereine - Ramona

Dänn probier i jetz o no a paar reimendi Gedanka und tu mi gad scho am Afang bedanka,

wil, sött i mi im Ton vagriifa,

denn küneder mi jo bim Bischof vapfiifa.

O d Verein hond a Fusion under d Lupa gno, und seand zu da folganda Schlüss ko:

Hette mer gad alles zäma fusioniert - sapperlott Wär da för üseri Mitgliederzahla koga flott.

D Kosta vo da Neuuniformierig vom MVR hettemer mit Marpa teilt, und o gad erna sini Uniform neu gstylt.

Natürli müsstets viel meh spiela, also eigentlich ständig aber ufblosni Lippa sind im Moment sowieso trendig.

Da Tornverein het sich müsa überlegga,

ob ma ächt da Trainingsort uf Marpa müsst verlegga. Aber mängmol a längerer Tour,

wär zuasätzlich guat fürd Figur.

Da katholisch Kirchachor Marpa isch am End, wils zwenig seand und ofach nümme wend.

Obs Zemmalegga mit Rübsta an neue Früahlig brocht het, isch offa. Aber wenigstens het mas küna hoffa.

Für de FC git ko Fusion vom Fuessballfeld, wil für d Sanierig honds jetzt jo s Geld.

Renato

D Obervögel händ sehr, sehr fliessig trainiert, sind unzähligi Mol zur Krone z Marpa marschieret,
damit s hettid mithebe chöne bim Umzug in neue Dorfteil

au wenn's de eint oder anderi hettid mitzüche möse amene Seil. Uf ehrne Mäntel het's en neue
Schriftzug möse geh,

Räbschter-Marper Obervögel hett denn jede gseh.

- I glaub sie chönnt s Schitere vo de Fusion verkrafte, au wenn de Mehufwand sich in Gränze hetti
ghalte.

Reformationsjubiläum - Ramona Dia Evangelischa seand allna vorus sie hond en nöd, da Fusionsblues.

Im letschta Jahr isch s Reformationsjubiläum agstanda,

Da Renato häat sich denkt, do tuni nöd lang vahandla. Langi Redena wörid gschwunga a anderna Ort,

bi üs machemer aber lieber nöd zviel Wort. Mit da Sunnabräu tut er sich zämmaschlüssa, zum
astoassa und a feins Bierli gnüssa.

Korzerhand ladet er da evangelisch Kirchpräsident und dazua no da Bischof ii. I ha mi jo scho gfreut,
ha mear aber dänkt: ka da sii?

Förd Firmig loht sich da Bischof all Schaltjahr amol z Räbschta blicka. Wenns aber Bier git, tut er sich
subito dri schicka.

Statt immer nu grausliga Wii vo St. Galla, hät er sich aso s feine Guggelbier loh gfalla.

Da friedlich Zämmasii vor de Sunnabräu wär gsi d Vision für mängi Ehe und natürli o fünd Fusion.

Renato

A de Stammtisch hat me diskutiert und lamentiert und schliesslich über e gmeinsams Motto no
studiert,

„Üs gfallt's z Marpa" und „Räbschta läbt" das goht nöd, wenn me's nur zäme kläbt.

„Üs gfallt's z Räbschta-Marpa" hettet die einte gno,

en Marper händ gmaint, stimmt nöd, mer gfallt's nu do. Zum andere wär „Räbschta-Marpa läbt" au
nöd gange,

„wil Marpa schloft" hat eine gsait und de ander hät em eini wele lange.

Drum blibt's jetzt wie's isch

und jede trinkt a sim Stammtisch, Wie's ehm beliebt, Bier oder Saft, Halt das, was ehm git gnueg Kraft.

Egal öb eu die gschiteriti Fusion tuet schmerze,
oder au nöd, - was Jesus üs gsait hät, nämed's zu Härze, Lieb Gott, din Herr und din Nögschte,
öb er us Marpe chunt oder Räbschte.

Mer wänd witerhin e gueti Nachburschaft pfläge, und zelled debi uf Gottes Säge.

Überfall Gärtnerei Rohner - Ramona

As isch bekannt und so mänga triibts id Wuert, nünt meh isch hützutag seacher a Hab und Guet.
A da Grenzä seand nöd nu Lastwäga und Fremdposter unterwägs, nei, as häat o Räuberbanda, wie verhextl

Dia triibid i üsna Dörfer eras Unwesa, und prompt kamma denn im «Blick» läsa:

«Räuber gestoppt» - ez gsächeder gad,
im Vaglich zu Marpa isch s Läba z Räbschta gär nöd fad.
«Wegen Überfall geschlossen» stoht bim Rohner a da Tör,
so öppis gits nöd amol bim Gschäft vom OV 14, üsam Coiffeur!

Um Himmels willa, wa söll ma do nu macha, schliesslich isches jo nöd zum lacha.

An komische Kauz z Amerika wür a Muur loh boua, und woass i wieviel Milliona damit vasoua.

Bringa würs nünt und as wär o ko schöani Pracht.

Da Markus Rohner häat üs zoaget, wimmas besser macht.

Dia Zit vo da heldahafta Cowboys z Amerika isch vabi, an Rübster - da müsst ma sii.

Ohni Angst mit Bäsa und i da Söck am Übeltäter heannano, an präzisa Schlag häat em bald no s Bewusstsi gnoh.

Und d Moral vo dära Gschicht,
as git a neus Fach im Schualunterricht.

Da Lehrplan wörd jo eh all Hännaschiis gänderet und vadreit, drum hani bim Bildigsdepartement s Fach Bäsakampf beatreit. Und s neua Waffagetz wird ergänzt um en Paragraph:

Erscht mitem Bäse und Gottes Hilf hommer en sichera Schlof.

Work-Life-Balance - Renato

Work-Life-Balance heisst s „Unwort des Jahres“; i chas nümme ghöre, i hass es.

Wer weiss scho, was me darunter versteht? Wie viel uf jedere Siite vo de Woog no goht?

Vili Arbeitgeber und Politiker meined i de hütige Ziit,

alli ehri Manager, Buezer und Sekretärinnen seged so gschid, ihre Arbet so könne iizteile, dass es für jede stimmt,

und jede sich demit gnueg Freiziit nimmt.

Dass i begriffe ha, dass das nöd funktioniere tuet, do deför bruch i bi Goscht kein Zauberhuet.

Solang jede über 42 Stunde chrampfe muess und Überstunde mache, hät d Famili dehei überhaupt nünt meh z lache.

Es blibt kum Ziit für en Verein, für es Ehrenamt findsch au kein.

Damit das ganzi wüirklich chunnt is Lot, halted mer üs a Gottes Gebot,

Du söllsch de Sunntig ehre und rühbe, zu Der, dinere Familie guet luege.

Für alli wo vo Work-Life-Balance reded han i e Idee, 32 Stunde Schaffe bi vollem Lohnusgleich, nöd meh. Liebi Chefe, s'Läbe wär halb so schwär,

wenn mer bechämmed e chli meh Salär. und i nöd ständig früh am Morge, scho müesti für de Zahltag sorge.

Dorfklatsch - Ramona

Imana Dorf wi Rübsta wörd vazellt und gredt gar viel. A Neuigkeit als ersta z'wissa, isch s oberste Ziel.

För säb momma nöd amol id Beiz oder go posta go,

News und Action kamma o im Sunntigsgottesdienst überko. Stellid eu vor, wia usam nünt isches passiert,

d Seelsorgerin isch währed am Gottesdienst kollabiert.

As isch wohr, ohni Vorwahrnig beani voll in Ohnmacht keit, Glück, dass mini Fassada no ganz isch, hond Kirchabsuacher gseit. As hett mi denn scho greut, Gäld ina Nasaoperation z investiera, aber us da Kolleкта vo hüt heti da Gäld scho küna generiera.

Noch deam Kreislaufkollaps beani schnäll wieder binanand gsi. vamuatlich ischs Zmorgabuffet a kli mickrig gsi.

Do frogt mi doch d Wucha druf a Keand im Religionsunterricht: Frau Casanova, stimmt denn da, womma spricht?

S Grücht goht ummi, isch sie ächt schwanger? Jo, jo, so schnäll gohts und ma stoht am Pranger.

Drum: allen Wundernasa under üs sägis ez definitiv, Da Test isch schlicht und ofach: negativ.

Will mör Seelsorger a sältene Art seand, momma handla und zwor gschwind.

Da neu TVO-Fernsehstar vo Rübsta, do künnti wetta wür dia Situation seacher mit Bravour retta.

D Samariterin Marlies Ritter mos näbet da Arbet bim Tschuttspiel, künftig o a Delegation id Kircha schicka - da isch da Deal.

Nein, Spass bi Sita - as beidruckt mi wirklich fest, dasma do anand nöd behandelt, als het da ander Pest. So häat ma o mi vom Boda ufgläsa,

i mos säga - dia Rübster seand halt scho tolli Wesa. Jo, di christlich Nögschtaliabi wörd do gläbt,

ned nur wenn d Seelsorgerin halba stärbt. Drum machet immer witer aso,

de Herrgott isch um jede liebi Tat froh.

Dorfzentrum / Rebstock - Renato

Mit grosse Sorg han i verno,

was üs z Räbschte scho händ gno:

Kain Kiosk meh und kai Poscht,

wie söll das witergoh, sapperemoscht.

Au Fuessgängerstreife sind verschwunde über d Nacht, wär hät denn de Blödsinn gmacht?

Es isch es Wunder dass en no git de Coiffeur Sieber, vilicht isch es wil em jede als Trinkgeld git en Füüflieber.

S Roothuus blibt jetzt im Zentrum zum Glück, wo doch alles verschwindet Stück um Stück.

Will mer lang nöd gwüsst händ was us em Rübstock wird, hämmer üs Gedanke gmacht und drüber no sinniert.

Alterswohnige im Zentrum wäred nöd schlächt,

neui Läden und en Platz zum Verwiile- s'wär alles rächt,

E rollstuehlgängigs Roothus, e Tüüfgarage, en Kinderhort, dä Räßstock i neuem Glanz erschine zmitzt
im Ort,

i weiss, nünt Neus verzell i eu do, aber mache muess mes no.

D'Phantasie dörf debi ehre Ruum ineeh,

und söll mer jetzt niemert danke as Portmonee. Es macht absolut Sinn i Zuekunft z investiere, statt
do z sitze und nur z lamentiere.

Schliesslich müemer jetzt allne zeige dass Räbschte läbt- und keine vo üs mit em Füdle am Sessel
kläbt.

Mer wered kain Stüürfranke bereue, wenn mer s apacked mit vill Gottvertraue,